

Eng alternativ Bank - am Bangladesh

D'Alterfinanz, eng nei Associatioun, huet viru kuerzem, zesummen matt der Spuerkeess, e Konzept virgeluet, fir hei zu Lëtzebuerg en alternativt Spueren ze erméiglechen. De Spuerer kritt dobäi e manner héijen Zënssaz op senge Souen, wéi dat maartüblech as, dofir, an dat as dat eigentlecht Zil, brauchen déi, déi déi Soue léinen, och manner Zënse ze bezuelen. Lo fro Dir Iech sécherlech, sou Souen géif ech och gäre léinen. Dat wäert awer nüt esou einfach méiglech sin, well dofir muss een eng Rei vu Kritären, z.B. aus dem etheschen an dem ekologeschen Beräich, erfëllen. Et as evident, datt deen, deen hei zu Lëtzebuerg op en Deel vun sengen Zënse verzicht, nüt wëllt, dass domadder am groussen Autobunnen oder am klengen Autoë finanziert gin.

Dass et hei zu Lëtzebuerg esou laang gedauert huet, bis dass méi ethesch Approchen am Bankesektor Fouss faassen, as e bësse verwonnerlech. An et wäert sécher Joren daueren, bis déi alternativ Finanzéierung aus engem embryonalen Zoustand erauswüsst an zu engem bedeitenden Faktor an der lëtzebuerger Bankewelt gët, wann iwerhaupt. Domadder as dat aarmt Land Bangladesh Lëtzebuerg ëm Joren viraus, wann och matt engem e bëssen aneren, der Lag am Bangladesh ugepasste Konzept.

D'Grameen Bank verléint am Bangladesh säit 12 Joer Suën un aarm Leit, Leit, déi esou wéineg Suën léinen, dass déi traditionell Banken un hinnen nüt, awer och glad nüt interesséiert sin. Déi aarem Leit waren virdrunner ugewise op kleng Wucherer, déi pro Woch en Zënse vu bis zu 100% froen. D'Grameen Bank freet dogéint de maartüblechen Zënse vun 20 % pro Joer. Dat kléngt fir westeuropäesch Oure vläicht vill, mee am Bangladesh as dat en üblechen Zënse am Vergläich zu den traditionelle Banken, eben matt deem Ennerscheed, datt déi nëmmen fir grouss Projeten Suë verléinen.

D'Konzept vum Mohammad Yunus, dem Grënner a President vun der Grameen Bank, hat an huet Erfolleg. D'Bank huet am Bangladesh méttlerweil méi wéi 1.000 Agencen an e Portefeuille vun bal 2 Mio. Clienten. Dat heescht an anere Wieder: all 50. Bengal huet bei der Grameen Bank Suë geléint. Pro Joer verléint d'Grameen Bank ëmgerechent 12 Milliarden Frang un déi Aarm am Bangladesh. Et kann een also soen, dass dës Bank eng Institutioun gin as, déi och scho kopéiert gouf an anere Länner, an nüt all vun dese Länner si sougenannten Entwécklungslänner.

Et as also nüt vir näischt, dass de Mohammad Yunus, de Grënner vun der Grameen Bank, vun dem Magazine "Asiaweek" als ee vun deenen 20 wichtigsten asiateschen Personagen vun haut agestuft gët. An och nüt vir näischt, dass den Mohammad Yunus am Oktober den Simon-Bolivar-Präis vun der UNESCO iwerreecht krut, d'UNESCO, deen Organismus vun de Vereente Natiounen, dee fir d'Kultur an d'Educatioun zoustänneg as.

Ween as dann elo de Mohammad Yunus? Hien huet kee gesträifte Paltong un an keng Cravate, an trotzdem as en Economiste vun der Formatioun hir an huet säin Diplom op enger amerikanescher Uni gemaach. Nüt ze klasséieren, ausserhalb vun de Normen, fir nüt ze soen revolutionär an esou, huet hien dann och virun zwielef Joren, mat Hëllef vu westleche Geldgeber an de Vereente Natiounen d'Grameen Bank gegrënnt.



in: Votre argent a du caractère

Déi meescht Montantën, déi d'Grameen Bank verléint, leien tëschent 1.000 an 2.000 eiser Frangen. Vir eis Verhältnisser nët vill Suën, mee am Bangladesh geet et dur, vir e Stéck Buedem ze lounen, e bësse Geschier ze kafen oder e puer Stéck Véi. Et as nët noutwendeg, virdrunner schon eppes gespuert ze hun. Der Bank hir Garantie berout op enger kollektiver Solidaritéit. Dat bedeit konkret, datt jidferen, dee gäre Suë léint, matt 4 aneren, déi och gäre Suë léinen, eng Solidargemeinschaft bild, datt also jidferen aus där Grupp dofir biergt, wann een aus der Grupp nët kann zrëckbezuelen. Op dës Manéier sin et manner wéi 1% vun den Raten, déi am wöchentleche Rythmus fälleg sin, déi d'Bank nët resp. nët fristgerecht kritt. En Taux vun deem munneg kllassesch Bank dreemt.

Soubal se hire Prêt zrëckbezuelen hun, maachen déi meescht Clienten gläich e neien Emprunt. An esou geléngt et villen, matt der Zäit d'Aarmutsgrenz ze duerchbriechen an hire Liewensstandard ze verbesseren.

Iwerraschenderweis sin déi meescht Clientë Fraën. Bal 95% vun de Prêtë gin u Fraën. Am Fong as dat awer keen Zoufall, sou den Mohammad Yunus. "D'Fraën hun eng Visioun vun hirer Zukunft, an där vun hire Kanner. Si denken vill méi u Mar wéi d'Männer. A well si seelen d'Méiglechkeet kréien, hiert Akommes ze verbesseren, notzen si d'Geleënheet, fir e Credit ze kréien, a sin dobäi ganz zouverlëssch".

D'Grameen Bank am Bangladesh wëllt awer e bësse méi si wéi eng Bank, déi Suën un déi Aarm verléint, si gesäit sech och e bëssen an enger Papperoll, eng Bank déi hire Clientë, fir et emol esou ze soen, Liewensrotschléi mat op de Wee gët. Déi Rotschléi baséieren op véier Prinzipien: Disziplin, Eenheet, Courage an Aarbecht. Ennert de Rotschléi fënnt een z.B., dass kleng Famille besser sin, dass d'Hygiène wichteg as, dass d'Kanner sollen eppes léieren, dass een sech kierperlech betätege soll, dass een an der Famill

spuere soll, a finalement gët de System vun der Mattgëft, dee fir vill Famille ruinéis as, verurteelt.


Dir kënnt Iech virstellen, dass dës Ideologie an der Bank hir Roll an enger gewësser Förderng vun de Fraën, an engem mohammedanesche Land, wou dat Wuert Integritismus keen eidelt Wuert as, nët ëmmer a bei jidferengem op Géigeléift stéisst. Am Géigendeel. Et kënnt vir, dass mohammedanesch Extremisten d'Agencen oder d'Personal vun der Bank ugräifen oder dass se ënnert der Hand d'Bank diffaméieren.

Mee heiansdo kënnt d'Kritik och vun engem anere Bord: D'Demokraten sin deels schockéiert vun der paternalistischer Ideologi vun der Bank, a besonnesch eng Praktik gët kritiséiert, an zwar, dass d'Bank verlaangt, dass d'Bauern d'Kaderen vun der Bank op eng militäresch Aart a Weis grëssen. De President vun der Bank verteidegt dat, andeems e seet, jorhonnertelaang sin d'Fraë geléiert gin, hire Kapp no ënnen ze bëcken. De militäresche Grouss verlaangt, dass si no uewe kucken, wat si aus enger ënnergeuerdeter Positioun eraushëllt.

Vun där Explicatioun kann een halen wat ee wëllt, a vläicht si mir hei an Europa och vill ze wäit ewech, fir dat kënne richteg ze beurteilen. Ech mengen et kann een awer mat dem Här Yunus d'accord sin, dass seng Bank dozou bäidréit, dass déi bengalesch Gesellschaft an déi richteg Richtung évoluëiert. An d'Grameen Bank, d'Bank vun deenen Aarmen, as warscheinlech och nët ganz onschëlleg drun, dass bei deene leschte Legislativwahlen am Bangladesh, besonnesch ënnert de Fraën, eng héich Walbedeelegung ze verzechn war an dass déi mohammedanesch Integristen eng zolid Défaite erlidden hun.

Guy Antony

Bäitrag am Magazine BISTRO vu Radio ARA, den 24.12.1996
Quell fir d'Informatiounen rondërem d'Grameen Bank: Le Monde, 19.10.1996



in: Votre argent a du caractère